

四庫全書

子部

欽定四庫全書

子部  
通雅卷二十六  
七

詳校官中書臣朱文翰

員外郎臣牛稔文履勘

總校官降調編修臣倉聖脉

校對官中書臣高 中

謄錄監生臣劉 禮

欽定四庫全書

通雅卷二十六

明方以智撰

事制

名數戶版也 周禮天官小宰聽閭里以版圖春官天

府祭天之司民司祿獻民數穀數則受而藏之

司民軒  
棘角也

司祿文昌  
第六星也

秋官小司寇大比登民數周語宣王料民太

原仲山甫曰王治農于籍按于農隙耨穫亦于籍獮于

既蒸狩于畢時是皆習民數者也漢高紀五年詔相聚

保山澤不書名數石慶傳元封四年關東流民無名數者四十萬師古曰若今戶籍孔霸傳子福還名數于魯司會疏云漢之戶籍皆以版書之官伯注鄭司農云今時鄉戶籍謂之戶版

廢負逋賦也 吳志部界無廢負唐元載以江淮猶有資產籍舉八年違負正今時所云未完也樊儵傳典負者坐死蓋主典未完經承之人謂其侵漁故坐之

雁戶流庸也 漢書流亡他土庸作曰流庸唐書編民

有雁戶謂如雁來去無常也

白著白取也 唐元載相時郡縣白取民錢曰白著渤海高雲有白著歌曰上元官吏務剝削江淮之人多白著春明退朝錄云一曰世謂酒酣為白著

曰搜牢曰打稽曰淘擄曰斟數曰陸掠皆鹵掠也 後

漢董卓傳搜牢蓋為鈔掠意牢音去聲南史梁正德等

四凶謂之打稽王建傳謂之淘擄廣韻載斟數

他日郎  
斗切

兵奪人物也一曰鈔畧史貨殖傳秦破趙氏見擄畧

高帝紀毋得鹵掠王莽傳橫按五日後漢書應邵傳陸掠殘害京山引作陸略

牟利猶謀利也 漢書富商大賈無所牟大利言如牟蟲食禾也國策曰下牟百姓李廣利傳以將吏侵牟之物故者衆景帝紀漁奪侵牟牟本牛鳴宮聲也聲主同故為牟等因牟之狀為頭牟岑牟兪鰲通謀通謨則聲轉也淮南盧牟六合此牟與模通注言規模也侵牟則與蚺通謂蚺賊之也

漁奪侵牟猶法獵也 日者傳法獵農民以官為威以  
法為機一曰漁奪又用圉奪亦見漢書退之用漁劫  
廢舉即廢居今之屯積乘時逐利者也 子貢好廢舉  
尚書楦遷有無化居漢書曰廢居又曰蹠財役貧史記  
與錢通今放印子錢也石氏持錢訾次如苴賒貸郡國  
隋書謂之出舉興生唐李泌知邊客皆舉質取利舉質  
即質劑以收稱貸之利也魏志高柔傳頗復舉人錢不  
周禮注若今時加貴取息

黃冊以黃小而名也 近時黃冊凡郊祀以賦籍陳發  
畢收藏著為成式每歲總數十年攢造黃冊今其造冊  
所在南京玄武湖中唐制凡民始生為黃四歲為小故  
相沿號曰黃冊東門行下為黃口小兒廣韻簡鮮音先今  
人戶版籍也

土斷斷土著也 晉以後流寓者多遂為僑戶後行法

不便乃一以土著音酌論之名曰土斷晉興寧二年大閱

戶口土斷劉裕表庚戌土斷咸康詔實王公以下至庶



人皆主土斷白籍按江左之制諸土著實戶用黃籍僑戶土斷用白籍若依史照注以為白丁之籍則王公豈白丁哉

地著猶土著也 前食貨志曰理民之道地著為本故必建步立畝正其疆界六尺為步步百為畝師古曰地著謂安土也管子地員猶周官之土會土均也提封定墾限民名田正欲使安著樂業也李忠守丹陽流民著者五萬餘口

貌閱閱年貌也

隋文命貌閱高頻請為輸籍法閱貌

者閱年貌也今謂之年貌冊

荒閱大閱也 國語文王之法曰有亡荒閱注荒猶大

也後以大閱為演武之名

陰戶猶隱戶也 燕貴戚民為陰戶唐謂之匿戶如今

之隱戶也庾冰隱實實其隱也

利隱規影如今之影射也 宇文融言利隱詭脫唐志

又云規影徭賦如今影射亦曰飛寄其言紿隱官息錢

即欺隱乾沒也

空最言空有覆田括戶之計最也 唐玄宗時覆田使張空最務多其獲而流客頗脫不止如今報屯田開清增數也徒有空名便稱簿最

訂出猶料出也 通鑑訂出雉頭鶴氅白鷺縵齊梁之間謂賦民為訂說文訂平議也迥徑二韻皆收庾冰隱實戶口料出無名萬餘人以充軍實料出言檢料出也隱實者猶商鞅隱覈也

使驟急遞也 筆談曰驛傳舊有步馬急遞三等急遞最遽日行四百里即劉屈氂傳乘疾置也世說曰唐玄宗思嘉陵江山水假吳道玄驛遞令往寫貌熙寧中又有金字牌急角遞如古羽檄也唐郭處瑾兼安西請自募關中兵皆給遞馱按古但作代字代本徒耐切又特計切迭更也即遞字周禮注過所文書即今鋪遞也俗作逋金章宗泰和六年初設都控逋鋪官元制轉送十鋪一郵長有漆絹革帶縣鈴手槍襪襖賁文以行元又

立水站遞舊唐書吐蕃傳舉兵以金箭為契有急驛人  
加銀鶻愚又按楊升菴引元樂府玉兔鶻為證雲南插  
雞毛火炭亦古羽書之遺也周禮遞令謂驛馬軍書急  
聞者劉晏傳初州取富人主郵遞謂之捉驛

齊有刀敕御刀者分日帖敕也東昏親信左右御刀  
應敕等分日帖敕曰刀敕御刀捉御刀在左右者應敕  
在左右祇應敕命者

慮事錄事也慮囚錄囚也雋不疑傳錄囚徒注曰省

錄之知其情狀有寃滯與不今云慮囚本錄之去聲力  
具切遂訛為慮囚北京人呼綠布為慮布菜豆為慮豆  
是可推也為父使封人慮事即錄事也書納于大麓孔  
傳作錄言舜大錄萬機之政也高似孫主大麓為山麓  
之說按孔叢子桓子新論皆言歷試之使大麓萬機之  
政故陰陽和風雨時應其說與注疏合孟竒謂大麓者  
為壇於國外會諸侯或云大麓必山麓治水隨山是也  
若風雨時應則九年洪水不為畱邪

續食給驛食也 漢武紀元光元年徵吏民明當世習

聖術者縣次續食令與計偕宣帝元康二年詔吏飾廚  
傳以稱譽過客廚續食傳傳舍也管寧傳文帝詔吏從  
茵蓐道上廚食李泌言復府兵約開地為永業田令州  
府給長牒續食宋元皆曰供頓近日曰口糧曰供應

豹直即倬直 見聞錄御史初入臺陪直比五日衆官  
皆出此人獨留故曰豹直一作倬直楊鉅翰林舊規有  
倬宿例即倬直也李濟翁以豹直為豹霧之義迂矣立

倮以別暴而借豹耳黃朝英引職林曰起居郎五直一倮御史八者七直兩倮雜八者一直三倮徐渭作倮

正牙下牙即衙 牙即今所謂衙也唐朝正牙視事執政曰執堂事亦曰南牙武曌曰南牙宰相地字文化及帳中南面坐人有白事者不答下牙方取啓狀注猶古之朝退也劉馮事始曰後世官府早晚軍吏兩謁亦謂之牙號衙府或曰衙晡程大昌曰始於爪牙為義或以象牙飾旗智按建牙為旗旗門因為牙門晉傅咸疏郡



縣多空校牙門即謂衙門滕輔袁宏顧愷之陳子昂皆有祭牙禡牙文牙旗也因牙門而謂之衙門若謂以象飾旗此則拘矣通俗文客堂曰房漢書有房舍孔平仲謂衙非牙字則尚在夢中

籤求猶今之僉叙也馬仙琕籤求應赴史照曰郵籤按延壽南史故事府州部論事皆籤前直叙所論之事後云謹籤月日下當時王府有典籤官今吏書承行亦以紅籤裁帖其旁以便批決故外官坐穿堂謂之籤押

參懷猶參知也 晉已後預機務相參酌曰參懷如宋之參知即入街矣劉宋紀有參懷素門平進

轉帖猶今之知會也 唐武后甲申轉帖百官令拜表百官但赴拜不知何事蓋若今之都吏送知會部堂堂帖使司官知之

注色注其履歷也 隋虞世基納賄多者超越無者注色而已宋時未參選者具脚色狀謂之根脚邇來下司初見上司猶遞手本上開出身履歷曰脚色是也

曰旬休曰下沐曰請急皆假也。𣦵急請急跨月也。初  
學記漢律吏五日得一下沐。郝超請急省其父急假者  
五日一急一歲以六十日為限。晉令急假者一月五急  
釋名曰急及也。古休假名。王尼傳護軍與尼長假。顧琛  
傳假裝至假去聲。宋敏求退朝錄有連假之名。永叔題  
跋嘗言旬休或休假書古作𣦵。隸作急或作𣦵。史記周  
宣王告急于晉傳咸相諭草曰黃紙故事鋪不上門。𣦵  
急范甯啓𣦵衆官管改解故事𣦵音枯。智按唐韻有𣦵。

字元喜起居注曰請急跨月可以互證

稟假猶今預支也

黃門從官騶蹋陳蕃曰死老魅

復能奪我稟假不又續漢志諸將軍府有稟假音彼錦

反假者預借于官也彼錦之切恐非當是餽稟之稟

移病稱病移文也

稱病者移文門籍疏廣傳移病呂

強傳託病符融辭病皆稱病也天子曰不豫諸侯曰負

茲移病為漢百官注籍之名

子寧丁艱也

漢哀紀博士弟子父母死子寧三年後

漢祝諷言光武絕告寧之典陳忠爭之翟方進後母終  
三十六日起視事薛宣駁其兄修又按解嘲注應邵曰  
漢律以不為親行三年服不得選舉乃知漢制時改也  
乞身乞骸骨也 東漢李通傳以病上書乞身即乞骸  
意

予告命也賜告恩也 高紀注孟康曰漢律吏二千石  
有予告有賜告上郡太守馮奉世子野王遼病滿三月  
賜告與妻子歸杜陵就醫藥大將軍鳳風御史中丞劾

奏野王賜告養病而私自便持虎符出界歸家奉詔不敬杜欽奏記于鳳曰竊見今日二千石告過長安謁不分別予賜今有司以為予告得歸賜告不得是一律兩科失省刑之意夫三最予告令也病滿三月賜告詔恩也令告則得詔恩則不得失輕重之差又二千石病賜告得故有故事得去郡亡著令傳曰賞疑從予所以廣恩勸功也罰疑從去所以慎刑闕難知也今釋令與故事而假不敬之法甚違闕疑從去之意即以二千石守

千里之地任兵馬之重不宜去郡將以制刑為後法者則野王之罪在未制令前也鳳竟免野王病賜告不得歸家自此始范公稱言予告賜告皆非假後人因告而復起官故亦謂之假去聲

貲封迢予也 貲以豉切移與也說文曰重次第物也漢書民賣爵者無所流貲相如賦曰貲丘陵下平原師古曰延也說文又有賸字迢予也蓋專以迢作移字用孫愐彼義切韻會引小顏曰欲賣爵者無有差次不得

流行故為差級凡物一重為一貳集韻或作紆又支韻  
今士夫貳封即本此

投鉏之鉏如撲滿而大也人知趙廣漢為鉏笏鉤距按  
王溫舒傳言少年投鉏購告言姦溫舒為中尉當武帝  
時在廣漢前又按鉏从缶說文曰受錢器后購切即鄒  
長倩所謂撲滿投其中不可出也今漢書本皆誤作鉏  
音項

八枳言維藩也 德枳維大人 大人枳維公公枳維卿



卿枳維大夫大夫枳維士國枳維都都枳維邑邑枳維  
家見周書小開篇言上下相維通為藩蔽也後漢馮衍  
賦曰捷六枳而為籬東觀記作八枳小補引漢高紀降  
枳道旁枳可為藩也

發輶推車也 說文反推車令有所付馮奉世傳再三  
發輶注引淮南子內郡輶車而餉音而隴反集韻作輶  
輶今按淮南覽冥訓廝徒馬圉輶車奉饗注輶音拊猶  
拊推也呂氏春秋曰樹相近而靡或輶之也附拊皆从

付聲而𦵏獨音冗以會意取耶如泛有捧音是一例也  
請寄請託也 鮑宣奏賞人反感請寄為姦言闕說也  
闕說見梁孝王世家謂闕隔其說也後漢明帝紀權門  
請記即請託也曹丘生數招權顧金錢謂請託錢也杜  
密多陳託守令梁松數為私書請託郡縣免南史裴松  
之為長沙郡丞刺史王蘊之曰貧無還資士有一禮之  
命者我為行之曰豈以鴻都仰累清風蓋謂說囑情分  
也唐玄宗言嚴挺之請屬所由

闕策猶闕說也或曰交闕 梁孝王傳有闕說谷永傳  
無所闕策五行志捐身闕策石奮傳寧不闕決于慶鑑  
交闕謗毀後因以書約為交闕徐勉與子言交闕已定  
或曰闕署其事

先游先為之游揚道地也 鄒陽書曰先談即先游也  
張耳雅游言雅能游也又言先容國語先導亦謂先容  
道地也導卻至使政晉田延年傳光欲為道地酈食其  
傳莫為我先師古曰先紹介也張湯傳不能為地灌夫

傳嬰愧為資皆此意

聲地聲價門地也 江績劾秦桓修免修聲地今人每言品地言品格地位也後漢書袁本初坐作聲價

大諾批答也 梁陳伯之為江州刺史不識書得文牒辭訟惟作大諾而已齊江夏王鋒高帝使作鳳尾諾以玉麒麟賜之唐紀曰凡諸侯牋奏皆批曰諾而草書若鳳尾形宋明帝紀胡母輔專權語曰禾絹閉眼諾胡母大張橐禾絹謂帝也此即文書後之押字也自漢有之

宗資任范孟博歌曰南陽宗資主畫諾張緒曰一生不  
解作諾汾晉之間尊者呼左右云咄左右必諾劉義叟  
曰咄嗟而辦當作咄諾而辦此又不必矣詳辦見釋詁  
條江左詔書畫諾唐時畫聞即今之畫知也李肇曰堂  
帖押名曰花押韋陟五朶雲體是也歸田錄言學士院  
用押字咨報  
殿最一曰殿郵 直翁曰督郵主諸縣罰負殿郵糾攝  
之

唐宋之對移即漢之換縣令之調也 薛宣傳奏粟邑令尹賞與頻陽令薛恭換縣而皆大治泊宅編云今官不振職者許郡將部使臣兩易之曰對移余見唐已有此語今則曰調繁調簡

末作謂末業也 周禮幣餘注曰占賣國中之斤幣皆末作疏曰不入大府指斤出而賣之故曰斤幣重農為本故謂之平民非農民則為末作子長所以歎末業也古今口數湖冊為詳 遜園曰侯鯖錄天下生齒之數

止據宋會要戶數言耳今以後湖志載古今人口數參  
諸史冊禹九州口千三百五十五萬三千九百二十三  
周成王時口千三百七十萬四千九百二十三漢自高  
祖訖于孝平口五千九百五十九萬四千九百七十八  
東漢光武中元二年口二千一百萬七千八百二十桓  
帝永壽三年口五千六百四十八萬六千八百五十六  
晉平吳之後口千六百一十六萬三千八百六十三隋  
大業二年口四千六百一萬九千九百五十六唐天寶

十四載口五千二百九十一萬九千三百九宋治平三年口二千五十萬六千九百八十熙寧十年口三千八十萬七千二百十一紹聖元年口四千二百五十六萬六千一百四十三元符三年口四千四百九十一萬四千九百九十一大觀四年口四千六百七十三萬四千七百八十四洪武中戶一千六十五萬二千七百八十九口六千五十四萬五千八百一十三弘治十五年戶九百六十九萬一千五百四十八口六千一百四十一



萬六千三百七十五嘉靖二十一年戶九百九十七萬  
二千二百二口六千二百五十三萬一百九十五萬歷  
六年戶一千六十三萬一千四百三十六口六千六十  
九萬二千八百五十六數較前代獨多然今之隱漏者  
實夥總之冊籍雖具漫難憑據會典稱休養既久生齒  
漸繁戶籍分合及流移附屬并脫漏不報者多其數乃  
減于舊此探本之論也

改元不宜雷同亦有避忌 學古適用編曰洪武初命

政府改年號不可同前而永樂天啓皆載正史者何大臣之不學若此智按梁王琳奉蕭氏改元天啓方臘改元永樂又按馬令南唐書張遇賢為中天八國王改元永樂丘天民會編年號一書然旁見則未免漏矣其所當避忌者如桓玄號大亨有識者以為二月了而玄之敗實在仲春隋開皇初梁主蕭琮改元廣運江陵父老曰運之為字軍走也北周武帝改元宣政蕭歸離合其字為宇文亡日煬帝大業識者曰離合為大苦末也陸

文裕曰正字以一止為文前代多諱之如齊文宣太子

殷字正道

邢子才所取

帝曰正一止也吾兒其替乎梁武陵

王紀改元曰天正人以為一年而敗

按是永豐侯蕭攜言

亂亡之

事或出偶然考之帝王建元自漢武始兩漢無有以正

紀年者至魏齊王芳改元正始高貴鄉公改正元竟俱

不祥金煬王有正元正隆之號金哀宗亡國之年亦曰

正大元順終于至正豈盡偶然耶後世臨文亦宜稍避

所謂宰相須用讀書人也

田賦

輅田易田也 晉語曰作輅田即左傳之爰田也左氏  
注曰分公田之稅應入公者爰之于所賞之衆賈侍中  
曰輅易也為易田之法服虔孔晁曰賞衆以田易其疆  
畔漢志秦孝公用商君制輅田開什佰張晏曰周制三  
年一易以同美惡孟康曰三年爰土易居古制也鞅復  
爰田上田不易中一易下再易食貨志曰歲耕種者為  
不易上田休一歲者為一易中田休二歲者為再易下

田三歲更耕之自爰其處趙過為搜粟都尉能為代田一畝三畝歲代處故曰代田古法也后稷始畊曰以二耜為耦廣尺深尺曰畊仟佰即阡陌蔡澤曰決裂阡陌阡陌乃井之舊開者乃剗削而非創置也

方田均田歸于定籍則井田至今在也 本周官均土之意董仲舒言井田難率行宜限民名田師丹請于成帝不行哀帝時行之王嘉傳詔書罷苑而以賜董賢二千餘頃均田之制從此墮壞王莽有王田之議區博諫

止之晉大康十年有男子與七十畝之制元魏孝文以  
李安世之言均授而旋罷隋均田且給永業田唐太宗  
定口分永業田丁男十八以上人一頃八十畝為口分  
二十畝為永業分寬鄉狹鄉後漸敝失永徽報罷宇文  
融言戶版刊隱去籍詭脫開元九年括田融請籍收匿  
戶羨田為覆田使周世宗詔行元稹均田法宋熙寧五  
年修方田法元豐罷之崇寧復行宣和又罷端拱景德  
且講方田于邊得其人故可行也惟張橫渠確以為井

田可行朱子曰須大亂後董日鑄曰後儒以井田截若  
棋局泥矣殷更五十為七十周更百畝必易井而界之  
不暴于商鞅乎是所謂在籍不在田者也孟子曰其實  
皆什一也方田而定之萬厯江陵柄國行文量法即方  
田也竇儼曰小畝步百周之制也中畝二百四十漢之  
制也大畝三百六十齊之制也今所用者漢之中畝唐  
突厥傳杜佑言商鞅佐秦以為地利不盡更以二百四  
十步為畝是漢制乃秦制也宋郭諮傳諮攝肥鄉令以

千步方田法四出量括遂得其數收逋賦八十萬沈括  
增折會方田法歐陽修言諮方田法簡而易行詳見算  
數潛草曰周禮載師以宅田士田賈田任近郊之地以  
官田牛田賞田牧田任遠郊之地以公邑之田任甸地  
以家邑之田任稍地以小都之田任縣地以大都之田  
任疆地凡此諸田無非一夫百畝之內田也顏淵郭外  
內六十畝寧自耕耶賈而私之佃于農夫若古無私田  
之人則古無貧富之家矣井田之中全不礙富人之田



將謂奪富人以與貧民耶聖賢之道未有不合天地人而咸宜者也故曰限田均田自難民生日繁地闢已定以井田之意而定公田此易簡之王道也世所疑難井者周公九章勾股方田之道久不講矣古豈無山谿險隘之難乎周禮華離注云佻邪離絕也孟子之截長補短可推論矣今之佃即古之受也後湖之魚鱗冊非古意乎公田之籍一正則官民易于守法奉公而貪污不利于乾沒隱射故皆欲亂其籍也

算事算丁賦也事役也

漢高四年初為算賦如淳曰

漢儀注民年十五以上至五十六出賦錢人百二十為

一算治庫兵車馬二年注如淳曰律年二十三傳之疇

官應邵曰漢律人出一算惟賈人與奴婢倍算賈捐之

傳孝文民賦四十丁男三年不事賈山傳高年九十者

一子不事八十者二算不事景紀今年二十始傳後二

年詔令訾算十以上乃得官朕甚愍之訾算四得官服

虔曰訾萬錢也應邵曰十等十萬也賣人有財不得為

吏廉士無訾不得官故減訾四算武紀建元詔八十復  
二算九十復甲卒宣紀地節詔流民還歸者勿算事言  
不出算賦及雜徭役也復甲卒者不豫革車之賦周禮  
大司徒注若今瘞不可事不算卒可事者半之也卿大  
夫注若今九十八十復羨卒也大宰注賦口率出錢也  
若今算泉民或謂之賦幣餘謂占賣國中斤幣皆末作  
當增賦者若今賈人倍算矣昭紀減天下口錢昭帝加  
元服毋收四年五年口賦漢儀注民年七歲至十四出

口錢武帝加口錢十三貢禹傳武帝征伐重賦于民產  
子三歲則出口錢故民生子輒殺宜令男七歲去齒乃  
出口錢年二十乃算建武詔口賦勿收責明帝詔因詣  
五原朔方又復其口算亦曰收事三輔民就賤者且毋  
收事師古曰收謂租賦事役使

過更更役也 如淳曰更有三品有卒更踐更過更古  
者正卒無常迭為之一月一更是卒更也貧者欲得顧  
更錢次直者出錢顧之月二千是踐更也天下人皆直

戍邊三日亦名為更律所謂繇戍也丞相子亦在調行者往不見還因便住一歲一更諸不行者出錢三百入官官以給戍者是過更也食貨志曰月為更卒已復為正此漢初因秦耳師古曰更卒謂給郡縣一月而更正卒謂給中都官者吳王濞卒踐更子平賈謂庸直也晉灼曰借人自代為卒者官為出錢顧其時庸和帝時流民更賦安帝除三年逋租過更虞詡傳永平章和中州縣以走卒錢給貨貧民走卒伍伯之類令出資錢不役

其身其言踐者人直一月猶踐履而去若顧人當隨時  
價謂之平賈漢錢貴不得定為二千也若不直而入錢  
于官謂之更賦其番上尉主之不役而收其直亦曰更  
賦唐法歲役二旬不役者收其庸日三尺過更者言三  
日之戍過之即更猶更率一月名踐更非謂出錢入官  
乃名過更索隱引姚氏言五月而休顏以為三月居更  
三日戍邊總九十三日此則不能考其是非矣曰復卒  
者晁錯曰令民有車騎馬一匹者復卒三人除三夫不

作甲卒也元平詔減外繇外繇者雜徭役也功臣表東  
茅侯劉到坐事國人過員免信武侯靳亭祝阿侯高成  
坐事國人過律免皆文帝時三國志作太初官州郡皆  
義作言于常役之外供役助朝廷也

鄉帳鄉計簿也 唐六典一曰租二曰調三曰役四曰  
雜徭役即庸也凡里有手實歲終具民之年與地闊狹  
為鄉帳又有計帳具來歲課役以報度支大厯元年天  
下苗一畝稅錢十五號青苗錢又地頭錢每畝二十此

即兩稅之意德宗建中元年楊炎始定兩稅法當時議之今天下用條編何其便民也宋手實青苗之名亦因于唐而當時沸議以智論之非常之原黎民懼焉如保甲顧役制藝諸法何其便于近代乎其弛錢禁而收青苗錢此可笑者官與民為市則末世吏胥之奸叢矣通商惠工而官增行其錢鹽中邊中京而屯足以養兵則大道也王者豈諱富哉安石魚水之遇而不達物情大為可惜



會計會所上之計也 史記禹會諸侯江南計功命曰  
會稽會計也周有司會歲會月要日成士會法曰要會  
者士師歲終正要會定計簿也曰比要者要會其簿也  
曰役要者役之章程民徒數也魯語曰收擣而蒸納要  
也漢受計者受郡國上計簿也其上簿之使即謂之計  
武帝詔明世務習聖術者令與計偕與計使偕來也張  
蒼為計相後更以列侯主計嚴助上書願奉三年計最  
如淳曰當使丞奉歲計今助自欲入奉之最凡要也非

殿最也匡衡位三公領計簿光武紀越雋人任貴自稱  
太守遣使奉計後遂有奉計之稱衛宏漢舊儀朝會上  
計律常以正月旦受羣臣朝賀天下郡國奉計最貢獻  
表元狩二年上谷太守郝賢坐計謾免晉張寶送璽長  
安遣王該帥步騎援且送諸即貢計言貢土物與計帳  
也唐六典一歲一造計帳三年一造戶籍王彥威上占  
額圖又上供軍圖皆帳簿也宋金耀門文書庫藏三司  
帳籍元豐有六曹架閣紹興五年張絢言蘇轍常做景

德皇祐作元祐會計錄未及上今宜作紹興會稽錄乾道號為都籍此即急就章之所謂集課錄也

職田職分田也 載師疏大夫以上有采有賞田及加

田又有士田及圭田左傳楚子重請申呂為賞田魏惠王求吳起後賞田二十萬漢昭賜蘇武公田二頃晉王導有賜田陳騫衛瓘皆給廚田隋開皇始給職田以蘇孝慈言官司出舉興生煩擾百姓請禁止給地以營農從之開皇中又給公廨田唐通典曰晉公卿各有菜田

及田驕後魏孝文給刺史太守公田唐食貨志言給祿  
頗減隋制職分田一品十二頃減至九品二頃諸州都  
督都護親王府官鎮戍關津岳瀆官三衛中郎將上府  
折衝都尉等皆有田又有永業田流內九品以上口分  
田終其身六十以上私停乃收又有公廨田供公私之  
費後以用度不足京師俸賜而已諸司置公廨本錢以  
番官貿易取息計員為月俸料貞觀以職田給逃還貧  
戶每畝給粟二斗謂之地子十五年置公廨本錢以諸

司令史主之號捉錢令史褚遂良疏罷之復給百官俸  
十八年復給職田光宅元年有納庫品于開元收田與  
逃還貧民十九年初置職田頃畝簿永泰元年百官請  
納職田充軍糧矣建元復減百官料錢李泌又增百官  
俸會要曰李絳請抽一分職田收貯以備水旱公廨錢  
自開元收之以稅錢充俸楊綰傳故事舍人年久者為  
閣老其公廨雜料獨取五之四綰悉均給之漢兒寬傳  
注師古曰若今諸司公廨牛羊宋真宗興復職田檢討

杜鎬言晉制有留藁之田又得蔭人為衣食客及佃客  
後魏宰人之官各給公田刺守以下至縣令丞亦有六  
頃職分田起于此矣唐月俸之餘有食糧雜給祿粟之  
外又有利息本錢加以白直執刀防閣掌固之類悉許  
私用役使潛有所輸五代廢職田而本朝興之故事無  
輸稅之文上從之天聖詔曰吏給職田所以養廉節也  
慶厯均公田復限職田紹興復職田東南諸路收圭租  
有過給者智見茅鹿門評蘇文曰老泉欲以職分籍沒

之田作養兵之費不知當時通天下有是田否自是鹿門全未之考也金元志官皆有職田初亦增行省叅政公田洪武十年賜百官公田租以後公田俱入官止給俸祿郡邑所在田皆起科陸文裕曰不聞有公田之名乃未考也邊方大將有養廉地土頗收其入以代公費其職田之遺乎

為官營田曰浮戶 通典宇文融括隱田曰浮戶十共作一坊官立間舍謂之營田戶弱侯曰令浮戶為官營

田曰管田户勿以為屯田户也

通雅卷二十六



欽定四庫全書

通雅卷二十七

明 方以智 撰

貨賄

白選漢白金幣也 漢志內府多銀錫鑄白金三品一曰重八兩圜之其文龍名白撰直三千二曰以重差小方之其文馬直五百三曰復小橢之其文龜直三百更鑄三銖錢史記作白選重差作重莧謂此以半斤差為三等也今誤解以重差復小為二品三品之名則非矣

皆名白選也爾雅白金謂之銀而漢白金以銀錫為之  
貨殖傳金錫連徐廣曰鉛未鍊者莽錢布穀以連錫注  
李奇曰鉛錫璞名曰連應邵曰連似銅師古曰李孟說  
非許慎曰鏈銅屬也此下文又云能采金銀銅連錫益  
知連非錫矣殆真鉛與銀錫之類也唐建中初判度支  
趙贊采連州白銅鑄大錢一當十亦白選遺意也續會  
要曰開寶中減桂陽監歲入白金三之一至道廢邵武  
成州金場又廢衢州銀冶景德中建州寶通山出銀以

圖來獻天聖中虔州石城產銀置義豐場按諸處言銀則桂陽監之白金為白銅明矣是自漢之白金幣非真銀後遂以白銅為白金耳白銅亦稱青銅慶厯中知商州皮仲容采青水青銅鑄錢張鷟號萬選青錢曰青者別其非紅黃也紅銅加鉛則黃鉛太多則色雜近黝鑄者煮黃之惟有萬厯錢最好千錢直一兩與開元通寶制合鑄用白銅民間每多用之號曰白沙

赤仄赤銅錢也 平準書鑄鐘官赤側赤仄也鐘官鑄

錢官也一當五應邵曰所謂子紺錢也如淳曰以赤銅周郭不知作法云何智曰即赤銅錢嘗見青綠古錢其質地皆赤應邵所云子紺子蓋紫之訛耳今人亦呼為紫銅

肉好好空也其圜實為肉周景王鑄大錢曰寶貨肉好皆有周郭以勸農贍不足百姓蒙利焉爾雅肉倍好謂之璧好倍肉謂之瑗肉好若一謂之環問奇集音肉為柔去聲爾雅注疏不音肉而好為去聲愚謂皆不必

也錢形似璧故亦稱肉好舊解肉為邊非錢邊曰郭肉在邊之中也盜摩錢質而取鉛故更鑄五銖錢周郭其質令不得摩取鉛鉛音浴銅屑也南齊曹武制錢皆厚輪大郭除其肉郭而重五銖者梁女錢也謂陰孔好也無輪郭不磨鑿而重二銖者宋景和之耒子苻葉也杜佑通典耒子作來子自此而外雖光天之鐵錫五銖開元之偏鑪錢稜錢亦有輪郭要其重曰當千者孫吳曰永通萬國者北周之當千曰直百者蜀與梁曰得壹者

史思明皆一當百也曰大泉者王莽曰重輪乾元者唐肅皆一當五十曰嘉禾者吳之一當五百也曰比輪者東晉之初渡曰大貨者陳一當五銖之十曰四柱者梁一准二十後准十曰兩柱者梁末也曰八銖者漢曰大布者後周曰乾封者唐高曰乾元者唐肅皆一當十曰赤仄者漢曰布泉者後周皆一當五也要其輕曰榆莢者漢曰四分者晉曰風飄水浮者元魏曰沈郎者沈充鑄曰耒子曰苻葉宋之二銖曰小錢者莽之一銖曰鵝

眼緹環梁末以至隋也其輕重得中者五銖武之上林  
三官錢亦五銖也光武復五銖董卓更鑄小錢曹公復  
用五銖劉宋四銖梁後魏隋之初皆五銖其敝則輕矣  
唐武德四年鑄開元通寶重二銖四參十錢重一兩其  
文以八分隸篆三體此其古今之得中者乎淳化御書  
錢乃太宗親書作真草行三體此正倣開元式也自後  
改元必更鑄以年號為文近朝京師所用者正五銖後  
亦四銖天下所用者皆與開元近後之二錢一緡者乃

崇禎末矣古禁散用銀故錢行今在交賦者官收其錢則錢行然官不收錢者以無羨餘也此別有議

九百錢以九十為百也 梁武帝普通更鑄鐵錢人皆私鑄嶺東八十為百名曰東錢江郢以上七十為百名曰西錢京師以九十為百名曰長錢大同詔聞外閒用九百錢今可用足陌錢此自宋晉平王休祐用短錢賦即唐皇甫鏹之墊錢也五代漢隱帝時王章以七十七為陌曰省佰錢詳見算數條下



飛錢會錢也 唐貞元中禁錢出駱谷散關商賈委錢諸道進奏院及諸軍諸使以輕裝趨四方合券取之號飛錢盧坦請許于三司飛錢每千增給百錢然商人無至者開寶三年詔于兩京置便錢務使陳鄂監倣唐飛錢也此即交子務交子始于蜀薛田張若谷請官置交子務時天聖元年也大觀元年改交子為錢引紹興元年張俊置見錢關子于婺州後行于淮南江東錢端禮造會子三十一年立會子務以千萬緡為一界小宰七

曰聽稱責以傳別注謂券書亦其遺乎商信朝廷而中  
邊中京之法行于淮領錢或鹽則鈔亦行矣

紀錢制者泉譜泉志 晁氏志梁顧烜唐張台有譜封  
演輩廣之李孝美合之成十卷金光襲有錄董道有譜  
陶岳撰貨泉錄一卷紹興十九年洪遵得古泉百餘品  
攬撫為泉志十五卷鄭樵曰泉者形如泉變而為器再  
變而圜故代以錢文而泉專為流泉用泉之篆下體不  
从水也先儒不知本末為流于泉布于布實于金利于

乃皆汭鑿之義智以泉篆為汭正泉有原之水原以泉為水源則泉非象水而何

竭水解池取鹽法也 山西解池周一百四十里紫色水出石鹽自然印成惟暴雨則耗公私共竭水徑防其淫濫謂之竭水山海經所謂鹽販之澤池西又有一池曰女鹽澤今說以南風成鹽後志注河車池有別御鹽四面刻如印齒文章唐志有鹽池十八井六百四十負海在外業鹽者為亭戶

渠展齊鹽也 禹英之商終月大男食鹽五升少半大女食鹽三升少半吾子食鹽二升少半禹讀為偶少半猶劣弱也吾子小男小女也渠展之鹽煮水為之十月至正月成三萬六千鍾下令曰孟春農事起無得煮鹽此則坐長十倍桓公糶之得成金萬一千餘斤

委府均輸籠貨物之府也 漢少府屬官有御府尚方典作衣服具白委府郡置輸官曰均輸開委府于京師以籠貨物後志凡山澤陂池之稅名曰禁錢屬少府天

子藏錢曰少府諸侯曰私府

少內中黃內藏也 丙吉傳少內嗇夫自古注師古曰

少內掖庭主府藏之官也淮南時則訓六月官少內景

紀以大內為二千石置左右內官主天子私財曰少內

桓紀建和元年芝草生于黃藏府韋彪傳中藏府受賜

錢莽傳黃門鉤盾藏府文選注曹植令曰皇帝損乘輿

之副竭中黃之府晉志少府統中黃左右藏等言中黃

門左右藏也魏為白藏庫隋闕左為左藏院自漢靈已

重左騶矣唐分左右藏各有庫有木雌契一隻與大府主簿合之折租貯左雜送物貯右

和市猶周之質人也 周禮地官質人掌成市之貨賄珍異凡賣儻者質劑稽市之書契同其度量壹其淳制淳與準同此即後世之平準和市也均輸籠貨物作委府太甚耳王莽立五均六幹徒為煩擾唐裴耀卿傳為長安令舊有配户和市法人厭苦耀卿責豪門坐賈豫給以直絕僂欺之弊唐百官志金部掌和市之事宋天

聖四年置西界和市場後遂為榷場僦欺詐人之僦直也凡以錢顧庸作或賃屋定租皆謂之僦

音就

漢志言僦

直僦費是也

山郎出沐錢也 出錢給文書得出沐曰山郎楊惲移

長度白罷之長度謂移文言其長計于度支也度支亦

曰雉度

雇山言雇人給薪也 哀帝紀女徒已論歸家復雇山

錢月三百

左騶輸東園錢也

桓靈時拜三公皆輸東園禮千萬

名左騶羊續舉緼袍示使故不登公位其時又有導行

費修宮錢

義錢金選罪贖也

虞翻上疏乞除義錢義錢者長史

聽百姓謫罰者輸贖者也即今之罪贖金布令有贖罪

呈金償有紙贖亦曰罰贖蕭望之傳罪贖有金選之品

選音刷謂鍰之率也詳見雜說金布令有罰贖故今人

亦稱罪贖為贖鍰



榷會會也 武紀初榷酒酤注師古曰榷者步渡橋爾雅石扛今之略約是也禁閉其事總利之官而下無由以得利有若渡水之榷因立名焉如淳曰榷音較較亦有古岳切也趙王彭祖傳使使即縣為賈人權會注榷禁他家獨會兩家之賈智謂會與會同貨殖傳節駟僧孟康曰節物貴賤也謂除估僧其餘利顏曰會合會二家交易者駟者其首率也音子朗反僧蓋漢之月平唐之經紀也月平見周禮注經紀見唐書駟與奘通俗語

以粗大為槩今江廣鹽每縣硃鹽之標蓋硃鹽也

辜權辜障也權專也 此漢書音義之解後漢紀亦言

豪右辜權陳咸鉤校辜權宦者傳辜較百姓較本音古  
岳切轉為古孝切故如淳以較音權此章辜較即辜權  
也智謂權雖有橋義然實與較通古作權王莽傳豪吏  
滑民辜而權之正謂籠障而專取也博雅揚權都凡也  
說文徐曰權之言罩也人謂粗略而舉之曰揚權毛氏  
曰權从月音洞不从山也互詳譴語以估較為是

進奉門戶猶今之門單也 唐德宗官市賤賣人物仍  
索進奉門戶及腳價等錢門戶者進奉所經門戶皆有  
費用漢靈帝時謂之導行費呂強嘗諫之即如今門單  
錢入京城有囊襍皆所不免此尚為輕其最苦者十庫  
本色之鋪墊

塌地剩茶茶稅也 唐武宗時崔珙增江淮茶稅諸道  
置即謂之塌地錢貞元江淮茶為大模一斤至五十兩  
咸通中于悰每斤增稅錢五曰剩茶錢溫公自陝歸洛

以俸餘買布洛市價高即以陝賈賣之南軒曰不如伊川塌麥有問者曰依市價可知當時稱塌之例語

封樁宋激賞之庫也 宋太祖別立封樁庫太宗改為

景福內庫專備邊用也紹興取戶部窠名可必者盡入御前樁管激賞庫張浚至行在詔浚隨行錢物隸內藏為封樁激賞庫紹興改為封樁下庫仍隸戶部乾道建左藏封樁庫于都省內遵藝祖景福之遺意以為軍旅之備自南渡有四百餘萬緡號月樁蓋朱勝非當國時

取之

頭子頭會也 政和間陳亨伯為陝西轉運使始議創  
經制錢大率添酒價增稅額官賣契紙頭子錢其後行  
之東南靖康初廢呂頤浩葉夢得請復之于是先取鈔  
傍定帖錢命提刑掌之毋得擅用經制錢總制之法創  
于紹興五年孟庾請頭子錢增十錢又收者戶長雇錢  
又收常平五文頭子錢智按漢書頭會算斂舊謂見人  
頭而斂錢以算收之因以抽頭為頭子錢

下碇洋舶之始至也 孔戣拜嶺南節度蕃舶泊步有  
下碇稅始至有闕貨宴幾禁止之海船用木毛沉之水  
中謂之下碇王方慶于崑崙舶秋毫無所索盧鈞不賤  
售海舶之珍皆以得名宋市舶使或置于杭或增置于  
泉州

實帳俟錢外稅也 秦置黔中郡漢改武陵歲令大人  
輸布一匹小口二丈是為實布唐詩漢女輸實布巴人  
頌芋田是也順帝永和武陵守言增租賦虞詡奏增之

必怨叛不從蠻爭貢布遂叛秦惠王并巴中君長歲出  
賦二千一十六錢三歲一出義賦千八百錢民戶出帟  
布八丈二尺雞羽三十鏃漢興南郡守靳疆請依秦故  
事秦昭王復版楯之人頃田不租十妻不算殺人以俟  
錢贖高祖發版楯定三秦復渠帥七姓不輸租賦餘戶  
入寶錢口四十永平中鄭純與哀牢夷人約邑豪歲輸  
布貫頭衣二領鹽一斛以為常今之版楯則在西粵頭  
頂一版以髮纏之頰以二尺竹片貫髮如簪

刑法

法比都目律令科品也 魏文侯師李悝著法經六篇  
有囚捕通鑑作網捕以律始于盜賊也蕭何除參彘連  
坐增部主見知益事律擅興廢戶三篇叔孫通傍章十  
八篇張湯越宮律二十八篇趙禹朝律六篇即張斐所  
稱朝會正見律又漢時決事集為令甲三百餘篇及司  
徒鮑昱法比都目凡九百六卷令甲者如淳曰令有先  
後故有令甲令乙令丙師古曰若今第一第二篇耳決



比者辭訟決事比也陳忠上決事比三十三條有科條  
遂為之都目劉祐傳移書所在依科品没入之安帝詔  
舊令制度各有科品宣帝紀品式備具孔光為尚書觀  
故事品式應劭撰具律本章句尚書舊事廷尉版令決  
事比例司徒都目五曹詔書及春秋斷獄凡二百五十  
篇崇文目春秋決事比即獻帝時應劭所上董仲舒春  
秋斷獄也貴與譏其緣飾淫刑然哉

版挈版令也租挈收田之挈令也田律蒐田律也水令

用水之約束也

張湯傳書于讞法挈令韋昭曰在版

挈也即應卽之廷尉版令元鼎六年上曰令內史稻田  
租挈重師古曰租挈收田租之約令也兒寬奏開六輔  
渠定水令師古曰用水之次定為法令召信臣作均水  
約束黃香遷魏郡守內外園田與人分種香曰田令商  
者不農表貉誓民注誓民以犯田法之罰也誓曰無干  
車無自後射疏曰此據漢田律而言秋官士師五禁注  
今野有田律是也周禮有司凡法令皆謂之公令何竝

傳注如淳曰公令吏死官得法賻公孫弘為學官請著  
功令師古曰功令篇名史記曰余讀功令至于廣厲學  
宮之路索隱曰即今之學令是也智以為此皆泥事作  
解功令即公令也晉志言漢哀時王嘉虧除先帝舊穿  
令斷律凡百餘事言改除其律令也唐有唐令三十卷  
趙綽金科易覽三卷宋有竇儀修刑統三十卷元豐斷  
例六十卷

租銖租稅律也 史記大事記孝文十三年除田租稅

律貢禹傳上書曰除其租銖之律注師古曰租稅之法皆依田畝不得雜計百物之銖兩

奇請它比別請它例也 成帝河平中詔曰奇請它比日以益茲師古曰奇請謂常文之外主者別有所請以定罪也它比謂引它類以比附之奇居宜反

聽請聽私請也 王子侯表沈猷侯受坐為宗正聽請不具宗室耐為司寇師古曰受為宗正人有私請求者受聽許之于宗室之中事有不具也

巧請巧于上請也 漢書責楊僕巧請又王溫舒傳巧請

驚事律以驚事告急也 六典魏命陳羣等采漢律為魏新律十八篇增漢蕭何律劫掠詐偽毀亡告劾係訊斷獄請賄驚事償賦等九篇有以驚事為變事者變事令上言變事也

廩律廩置事例也 魏新律中令序曰秦舊有廩置乘傳副車食廚漢初不改後以費稍省故後漢但設騎置

無車馬而律猶著其文故除廢律

名例刑名法例也 名例律即李悝第六篇具律也魏  
改漢具律為刑名第一晉于刑名中分法例律北齊併  
刑名法例為名例冠于篇首

酎金律八月飲酎而諸侯助祭貢金也 後志注丁孚

漢儀曰酎金律文帝所加以正月旦作酒八月成名酎  
酒因令諸侯助祭貢金漢律金布令曰皇帝齋宿親帥  
羣臣承祠宗廟羣臣宜分奉諸侯以民口數率千口奉

金四兩奇不滿千口至五百口亦四兩皆會耐少府食  
邑九真交趾日南者用犀角二長九寸以上若玳瑁甲  
一鬱林用象牙一長三尺以上若翡翠各二十準以當  
金蕭望之傳高紀臣瓚注晉志皆引金布令

三尺書律之簡也 鹽鐵論曰二尺四寸之律古今一  
也客謂杜周書不循三尺法周曰三尺安在哉朱博傳  
三尺律令人事出其中言三尺者周尺八寸三八二十  
四也

深故故不直也

趙禹傳曰緩深故之罪表注晉灼曰

律脫出為故縱入罪為故不直謂文深故入其罪即所云舞文文內也嚴延年文致不可得反皆此類也

搏拚拚人而奪其物也

安丘侯拾坐入上林謀盜鹿

又搏拚完為城旦師古曰搏擊拚襲以奪人物一曰六博也拚意錢也即嚴侯遂生拚搏奪公主馬此有明驗意錢之解何為乎即鉅已反

首匿自首出其所匿也


首謂出首首去聲匿藏匿也



功臣表臨汝侯灌賢以嬰孫紹封元朔五年坐子傷人首匿免千戶典略駱曜教民緬匿法

乏興猥逮訶譖皆律條也 律有乏興之法謂官有所興發而輒稽留闕乏其事也韓延年坐留外國書一月乏興入穀贖完卜式傳北邊有興猥烏賄切盛多也逮傳捕也猥逮者矯為官府多有逮捕也訶謂知處密告之也淮南王安傳為中訶孟康曰西方人以反間為訶謾音明隱語謂偵伺官府利害隱密其事有所追求也

說文謏流言也流言之解是急就章曰乏興猥逮訥謏求  
是也



通雅卷二十七

欽定四庫全書

子部  
通雅卷二十八

詳校官中書<sub>臣</sub>朱文翰

員外郎<sub>臣</sub>牛稔文覆勘

總校官降調編修<sub>臣</sub>倉聖脉

校對官中書<sub>臣</sub>高中

謄錄監生<sub>臣</sub>劉禮

欽定四庫全書

通雅卷二十八

明方以智撰

禮儀

今言三禮實有四禮而定于二禮 儀禮周禮皆云周公作後有大戴禮小戴禮是曰四禮小戴今禮記也最  
後而列五經以述孔子語也儀禮周禮列十三經大戴  
不列學官大小戴雷同家語而大戴載曾子語獨多則  
漢藝文志稱曾子十八篇此類是也正義叙云周禮儀

禮是禮記之本書有一禮必具一義禮本周公義本孔子經明于傳四禮定于二禮矣大學中庸禮經之心百世可知此易簡之至理也禮運曰禮本于太一分为天地轉為陰陽變為四時列為鬼神人者天地之心五行之端協于分藝道德仁義非禮不成藏智崇于禮卑內外本合易禮會通而幽明一矣司馬談宗道家而遷尊孔子繼春秋禮樂二書詳哉言之洋洋美德乎宰制萬物役使羣衆豈人力也哉此卓見也此遷所以為孝也

古作礼後作禮以禮運運禮器也使人履其體理也後世或失拘牽故曰禮時為大順次之體次之宜次之稱次之祭以孫為尸將嫁教于王宮三月大饗已廢夫人之禮而謂後世可泥古之迹乎郊祀疑天地分合宗廟疑昭穆迭毀太學令太常擇民明堂遵玉帶之圖漢始綿蕞其後止此唐貞觀禮出玄齡顯慶禮出無忌韋公肅有禮閣新儀王彥威有曲臺新禮宋聶崇義進三禮圖陳祥道著禮書劉溫叟上通禮盧多遜有纂義王皞

賈昌朝有新編新禮王洙尹師魯有禮器禮象而朱子  
家禮則儒者所宗也洪武革鉞笠都納之後舉徐一夔  
梁寅周子諒胡行簡劉宗弼董彝蔡深滕公琰修禮書  
宮闈外戚駙馬除前代弊祭祀而省俎豆冠服而省五  
冕訓儲而議再拜封拜而嚴本支父母均喪三年冠昏  
逮于士民三年大明集禮成諭陶凱曰教化必先禮義  
政刑非所先也叔孫雖禮糠粃然創制于煨燼兩生迂  
待百年朝廷之禮廢矣時哉大哉

廟以昭穆叙代因以班行為等輩之稱說文作侶穆大傳作昭繆王制天子七廟三昭三穆鄭玄馬融謂七廟劉歆王肅謂九廟黃氏曰左昭右穆父子序者常禮也祖功宗德不遷者義也周公制禮時文武在三昭穆外而不祧而未祧故止七廟懿王時文武已在三昭穆外而不祧故為九廟也原廟之遊衣冠始于孝惠飾非叔孫舞禮別室之藏神主始于孝明遺詔而孝章如之孝宣別祠戾園光武別祠春陵晉廟至七代十一室唐廟至九代



十一室宋初祀四親末祀十二帝而同堂異室則先儒所永歎也朱子曰後世不能考古各廟而合為都宮又以昭常為昭穆常為穆祧則子孫竟居父祖之上夫坐序賓主各以序迨即各廟而迨其室何難乎儀禮曰卒哭明日以其班祔記曰祔必以昭穆周禮塚人先正葬居中以昭穆為左右祭統曰祭有昭穆有事于太廟則羣昭羣穆咸在而不失其倫凡賜爵昭為一穆為一昭與昭齒穆與穆齒大傳曰合族以食序以昭繆此因父

昭子穆而稱其行輩猶云伯叔行常為伯叔行兄弟行  
常為兄弟行或祖孫幾代相齒故曰咸在而不失其倫  
左傳曰大王之昭王季之穆文之昭武之穆據父子班  
行而指其分族也漢舊儀昭西面穆東面據廟向南而  
左右指之也昭穆不可易而祖考子孫之次序反可亂  
越乎況世已同堂異室可更泥邪夏言之議是也禮因  
義起漢儒臆說豈孔子之意哉晉諱昭而讀韶或改為  
侶佩觿曰說文有侶穆智謂晉唐新附耳集韻作配

禘嘗通名禘與膺別推始祖亦稱為禘而周禮實無大  
禘諸儒皆未洞也 王制春禘夏禘秋嘗冬蒸天子膺  
禘禘禘禘嘗禘蒸諸侯禘則不禘禘則不嘗嘗則不蒸  
蒸則不禘諸侯禘膺禘一膺一禘嘗禘蒸禘膺與特同  
智考周禮無禘改為春祠夏禴祭統特牲多言禘陽嘗  
陰蓋以四時舉陰陽則曰春禘秋嘗合祭曰禘與一特  
一禘之禘槩而言之則曰禘禘而禘其始祖所自出則  
以禘為字法大禘即禘也禘以禘為大以膺為小以每

歲為大以越歲為小若曰天子禘諸侯祫禮無此明文  
若曰祫外有大禘豈周天子最隆之大禘而不設職掌  
于周官哉賈逵劉歆馬融王肅鄭玄張純皆混智別有  
論

釋菜即舍菜致獻也或曰醑也拾也設也 月令上丁

樂正習舞釋菜文王世子凡學春官釋奠周禮大胥春  
入學舍菜合舞謂設而致獻也史記張儀傳杖而醑之  
即釋說文釋从采

音辨

而詩釋之叟叟改作釋从米漬也

鄭氏曰諷籀九千者少古亦順手借音則漬醅拾設音義皆通自陸賈奏新語漢高遂祀孔子貞觀尊孔子為宣父明皇褒為文宣王宋立廟門戟真宗欲謚為帝禮臣議為至聖元皇帝而李清臣以周陪臣止之成化時周洪謨楊守陳皆有尊帝議張璁改木主稱師幸學釋奠八佾加籩司成坐講則定禮也呂柟王鏊議興禮樂惜未行也聖人萬世為師雖為周陪臣而百代以道帝之璫陽尊而巧抑耳

儀適儀注也 太史讀禮書而協事疏曰若今儀注太僕詔法儀小臣相王之小法儀注趨行拱揖之容也隋志曰儀注之興久矣唐虞以上分之為三在周因而為五周官宗伯所掌而太史執書以協事之類是也如淳晉灼嘗引漢儀注灼又曰衛宏漢儀所說多不實丁孚又作漢儀式章帝紀及祭祀志皆引之春秋正義引魏晉儀注寫章表別起行頭者謂之跳出晉新定儀注晉安成太守傅瑗撰隋志曰梁武始命羣儒裁成大典陳

許亨奏曰梁儀注曰一獻為質三獻為文事天之事故  
不三獻梁有五禮儀注明山賓賀瑒嚴植之陸璣司馬  
鑒所撰唐志儀注有六十一家宋三輯禮書紹興中太  
常復定儀注此二字至今相承用之儀適者竇融先遣  
從事問會見儀適謂儀注適合也

三朝外朝中朝內朝也 地官豪人疏天子三朝路寢  
庭朝是圖宗人嘉事之朝太僕掌之又有路門外朝是  
常朝之處司士掌之又有外朝在臯門內庫門外三槐

九棘之朝是斷獄蔽訟之朝朝士掌之師氏居虎門之左司王朝注路寢門也謂之燕朝以路寢安燕之處也文王世子曰公族朝于內朝親之也路門外之朝曰治朝其臯門內庫門外曰外朝詢衆庶之朝也通典曰周制四朝一曰外朝在臯門內聽訟之朝朝士掌之二曰中朝在路門外司士正其位三曰內朝即路寢燕朝太僕掌之四曰詢事之朝在雉門外小司寇掌其政常言三朝者以詢事之朝非常朝也易氏曰小司寇掌其政



朝士掌其法言外朝特詳則以通典四朝之說為非矣  
按先鄭之釋朝士外朝在路門外而康成援郊特牲小  
宗伯之文證之誠足以破後學之惑至小司寇之外朝  
則曰在雉門外何歟賈公彥為之說曰在雉門外則亦  
在庫門外要當以是說為正云漢亦有中朝外朝內朝  
之稱劉輔繫獄中朝左將軍辛慶忌等俱上書救之注  
孟康曰中朝內朝也大司馬左右前後將軍侍中常侍  
散騎諸吏為中朝丞相以下至六百石為外朝王嘉事

下將軍中朝者韋玄成詔中朝臣具復毀廟之文翟方  
進奏陳咸不當蒙方正舉備內朝臣又按橐人注司徒  
府中有百官朝會殿天子與丞相決大事是外朝之存  
者此語未敢謂然霍氏家亦曰殿古之通稱前代天子  
常幸臣子家則或過司徒府耳豈可謂之朝乎唐六典  
正至御承天門以聽政古之外朝也朔望坐太極殿視  
朝古之中朝也常日兩儀殿聽朝視事古之內朝也會  
要曰房玄齡請三日一臨朝貞觀二十三年詔每日常

坐顯慶二年隔日視事永徽二年太極殿五日一視事  
唐制以隻日視朝文宗用雙日貞元十八年罷正衙奏  
事

正衙御前殿也入閣御便殿也 宋庠言唐有大內有  
大明宮在大內之東北世謂之東內謂大內為西內自  
高宗以後天子在大明宮宮之正門曰丹鳳門門內第  
一殿曰含元正至大朝會則御之對北第二殿曰宣政  
謂之正衙朔望大冊拜則御之對北第三殿曰紫宸謂

之上閣亦曰內衙隻日常朝則御之會要曰貞觀五年  
詔諫官入閣貞元七年詔常參官入閣不得奔走文宗  
開成元年詔入閣日次對官班退立于東階松下入閣  
者入宣政殿兩門所謂東西上閣門也五代史李琪傳  
明宗詔羣臣五日一隨宰相入見曰起居琪請罷之而  
復朔望入閣然唐政事朔望日御宣政殿立仗正衙或  
御紫宸殿則喚仗入曰入閣前無此制開元以朔望上  
盤食玄宗避正殿遂移紫宸喚仗始有入閣之名敬宗

寶曆初始以月朔御紫宸入閣後之言唐故事者遂曰天子日御殿曰常參朔望薦食諸陵寢有思慕之心不能臨前殿則御便殿曰入閣按衙朝也其禮尊閣宴見也其禮殺僖宗乾符後因亂禮缺正衙常日廢仗而朔望入閣有儀其後習見以入閣為重至出御前殿猶謂入閣誤也宋淳化二年張洎奏曰今乾元殿即唐含元殿也在周為外朝唐為大朝至正仗衛在此今文德殿即唐宣政殿也周為中朝漢為前殿唐為正衙朔望起

居冊拜試策在此今崇德殿即唐紫宸殿也周為內朝  
漢為宣室唐為上閣即隻日常朝之殿也東晉太極殿  
有東西閣唐制紫宸上閣法此制也今以文德正衙權  
為上閣非憲度也洎所言當朝朔望亦與唐不同或者  
總合唐之初末而言之乎太平興國入閣舊儀軍校不  
入殿庭起居文武官入沙墀再拜鞠躬不呼萬歲紹興  
中王賞言前殿正衙設黃麾半仗紫宸垂拱係別殿不  
設儀仗十三年紫宸殿設黃麾角仗于是討論朔日文

德殿視朝紫宸殿日參望參垂拱殿日參四參之制今  
時朔望御正殿百官公服幘頭朝參而不引見奏事每  
日御門視事百官錦繡諸司奏事蓋以朔望御殿備朝  
賀之禮而以日朝御門為奏對之便較之唐宋善矣正  
殿皇極殿御門則皇極門也日朝後以三六九而羣臣  
一體無六參九參之分至受俘宴餚則御午門而常日  
召對則或在中極殿或在中左門或在文昭閣或在德  
政殿德政殿即中左門之左煖閣也中左門中右門即

唐之宣政殿東西上閣門也正至大朝賀則御皇極殿皮弁服百官朝服鴻臚寺前二日奏請升殿

俄眉班侍從先立班也 宋準舊儀侍從官先入起居畢分行侍立于丹墀下謂之俄眉班然後宰相率正班入起居俄眉即蛾眉也近時大朝則執事侍班官先于中極殿行禮分侍殿中然後外大班于殿下行禮三六九門朝侍班同行一拜三叩頭禮即前依陸螭分立由此觀之前朝之常朝亦侍班官先行禮也



橫行橫班也

宋初沿唐故事百官日赴文德殿宰臣

押班謂之常朝休假三日以上內殿起居官畢集謂之

橫行宰相以下應見謝辭者皆先赴文德殿謂之過正

衙猶今之辭見謝恩先在午門外行禮後入就門陞前

致辭叩頭也元豐四年御史滿中行言今垂拱內殿宰

臣以下既以日參而常朝不廢至于橫行正衙必俟天

子御殿日乃可行之虛名謬例欲望罷去詔從之嘉祐

三年詔立定橫行員數客省使至閣門使曰橫班宣和

官濫橫行至百十有八人宋敏求退朝錄曰舊制凡連假三日而著于令者宰相至陞朝官盡赴文德殿參假謂之橫行次日百官仍赴內殿起居近年連假後多便起而廢橫行之禮

表著班位也 左傳叔向曰朝有著定會有表會朝之言必聞于表著之位注著定朝內列位常處門屏之間曰著野會設表以為位景祐四年刊石為百官表位紹興中以內諸司為垂拱殿四參于殿門外設位版後請

四參石位裝字以黃蠟日參石位以紅蠟今皇極丹墀有品級山子是也

廊餐賜食廊下也 五代會要曰唐制常參官每日朝退賜食謂之廊餐舒元興記御史押百官入宣政門則分押于鐘鼓樓下若兩班就食廊下又分殿中一人為使涖之自乾符後月旦入閣日賜食禮畢閣門放仗羣臣俱拜謂之謝食建隆元年仗退賜廊下食云廊下食起唐貞觀

小見燕見也 史記褚先生曰侯王朝天子漢法凡當  
四見始到入小見止旦奉皮薦璧玉法見後三日為王  
置酒賜金錢財物後二日復入小見辭去留長安不過  
二十日小見者燕見于禁門內飲于省中非士人所得  
入也

夕者暮見也 柳宗元曰古者旦見曰朝暮見曰夕詩  
莫肯朝夕傳朝而不夕禮記曰日入而夕朝不廢朝暮  
不廢夕晉叔向夕楚右尹子革夕齊子我夕趙文子磐

其椽張老夕知襄子為室士茁夕皆暮見也漢儀夕則兩郎向瑣闌拜謂之夕郎亦出是名也

春曰朝秋曰請 吳王傳使人為秋請注孟康曰律春曰朝秋曰請如古諸侯朝聘宣紀時會朝請舍長安尚冠里張禹傳喜馮參俱奉朝請一曰請字去聲

常參曰朝參也 唐志文武職事九品以上及二王後朝朔望文臣五品以上及兩省供奉官監察御史員外郎太常博士日參號常參官武官三品以上三日一朝

號九參官五品以上及折衝當番者五日一朝號六參官

轉對次對也 唐制百官入閣有待制次對官興元中詔延英坐日常令朝官三兩人面奏時政得失後唐天成中五日内殿起居廢待制次對之官每遇起居日令百官轉對言事晉天福中五日起居以兩人轉對宋建隆三年御札朝臣以次轉對淳化二年詔復百官次對咸平中詔轉對章疏別錄一本留中紹興二年行在百

官日輪一人轉對又詔輪對已周復令轉對孝宗詔百官日輪面對

引奏門司仗家引入奏事也 唐時有門籍者皆得出入殿庭直至御前如其無門籍者若有急奏許門司仗家引奏無得闕碍故貞觀以來羣臣士庶皆得進言今時之引奏如門朝鴻臚引承差入奏通議在前讀其大要承差則跪橋邊是其遺也

御殿閱馬宋禮也 宋太宗至道元年御崇政殿閱騏

驥院所進馬仁宗明道二年正月御端明殿閱馬今時  
元旦大宗伯同執事官中極殿行禮畢奏曰行禮畢請  
上位看馬朝畢御馬監從會極門引馬入上中左門智  
嘗怪此禮行于元旦古所不載也

優策優禮策拜也 南史褚淵傳為錄尚書事有司疑  
立優策尚書令王儉議中朝以來三公王侯則優策並  
設官品第二策而不優優者褒美策者兼明委寄尚書  
職天官品雖第三拜必有策錄尚書事與本官同拜故



不別有策即事緣文不宜均之凡庶宜有策書用申隆  
寄既異王侯不假優文從之

失闌失闌入之禁也 漢王嘉傳戶殿門失闌免注闌  
止人也成帝紀闌入尚方掖門應劭曰無符籍妄入宮  
西域傳闌出不禁說文作闌妄入宮掖也即闌字

門籍置牒于門以案出入也 漢居宮中者皆有口籍  
以官名為鐵印文符門案省符乃內之若外人以事當  
入本官長吏為封啓傳元紀令從官給事官司馬門中

者得為父母兄弟通籍注應劭曰籍者為尺二竹牒設其年紀名字物色掛之宮中案省相應乃得入也梁王傳梁之侍中郎謁者著引籍竇嬰傳太后除嬰門籍京房傳願得通籍殿中奏事唐百官志左右監門衛掌諸門禁衛及門籍文武官九品以上每月送籍于引駕仗及監門衛衛以帳報內門凡朝參奏事待詔官及織扇儀仗出入者問其數監察御史正門無籍天授中詔側門置籍得至殿庭司門郎中掌門闕出入之籍凡著籍

月一易之儀衛志平明傳點畢內門開監察御史領百官入夾階監門校尉二人執門籍曰唱籍既視籍序班于通乾觀象門南武居文之次入宣政門至閣門亦如之夾階校尉十人同唱會要貞元八年十月復命金吾置門籍于文定謂門籍始于唐蓋失考耳

鄭注詩詁之解九擗皆非也 周禮擗即拜字九擗一稽首二頓首三空首四振動五吉拜六凶拜七奇拜八褒拜九肅拜鄭注奇為一屈一膝或為倚拜毛鄭以褒

拜為持節拜鄭大夫以振動相擊其說固非詩詁謂頓  
首置首于地即起振動謂恐悚迫蹙而下手吉拜雍容  
下手褒作報字恐亦未必然智謂稽首如今之跪拜禮  
頭隨手至地而起揖者也頓首如今之叩頭之類首叩  
至地也臣言稽首頓首謂先行稽首禮而臨起復叩頭  
也空首首不至地但下手司農所謂擡正如今所謂長  
揖宋以後所謂聲喏振動如儀禮之揖厭推手曰揖引  
手曰厭今所謂打躬連拱手是也吉拜盤辟雅拜如今

鞠躬拜興興拜之類凶拜稽顙而後拜也奇不偶也不  
再拜如今常朝但一拜士大夫久不相見或有同四拜  
者常時止一拜見長者則一跪而已褒拜褒衣致謝或  
致辭或答拜之類肅拜如所說婦人拜是也公羊僖二  
年注以手通指曰揖凡夫曰揖為前後手擡為上下手  
謂為頭觸地頓為伏地稽顙則觸地而伏也擡為計切  
揖擡謂稽分四字此字書之說也古揖且與挹通豈擡  
不與揖通乎曰長揖為聲喏至地則曰揖之為拱手躬

躬可知也字書好分別耳觀古人長揖足證古人本通用也涪翁雜說曰唐人書末言謹空蓋九拜之空首也智以謹空者猶今之柬末左冲耳

拘罷矩折言磬折之容也磬折即所謂平衡躬躬揖厭威儀也記磬折垂佩西門豹簪筆磬折鉤命決言孔

子向北斗磬折言句偃曲躬也淮南曰勾踐無拘罷矩折之容而勝注拘罷圓也矩折方也按罷當音擺今翔步必搖擺其來舊矣荀子平衡曰平下衡曰稽首至地

曰稽顙注平衡謂磬折首與要平檀弓吉事欲其折折爾舊注如提字亦強蓋謂矩折周旋中禮耳

聲喏猶唱喏也啞揖吐散告喝籠門屈揖宋儀也老

學菴筆記曰先君言舊制朝參拜舞而已政和以後增以喏然紹興中余造朝已不復喏矣淳熙末還朝則迎駕起居閣門亦喝唱喏然未嘗出聲也又紹興中朝參止磬折遂拜今閣門習使先以笏叩額拜拜皆然謂之瞻笏亦不知起于何年也又曰古所謂揖但舉手而已

今所謂喏乃始于江左諸王支道林入東見子猷兄弟  
曰見一羣白項烏喚啞啞聲即今喏也石林燕語曰三  
衙內見宰執皆橫杖子文德殿後主廊階下唱喏宰執  
出笏階上揖之外遇從官于通衢皆斂馬避斂馬之制  
久廢前輩記之矣惟內中橫杖子之禮迄今不敢廢也  
又曰中丞侍御史上事臺屬皆東西立于廳下上事官  
拜廳已即與其屬揖而不聲喏謂之啞揖以次升階上  
事官據中座其屬後列坐于兩旁上事官判按三道後



皆書曰記諮而後百司人吏立于庭臺吏事廳上厲呼曰咄則百司人吏聲喏急趨而出謂之咄散然後屬官始再展狀如尋常叅謁之儀始相與交談前此蓋未嘗語也案後判記諮恐猶是方鎮憲衡時沿襲故事記謂記室諮謂諮議不知啞揖咄散為何義然至今行之不改存中曰百官于中書見宰相九卿而下即省吏高聲唱一聲屈躬趨而入宰相揖及進茶皆抗聲贊喝謂之屈揖待制以上見則言請某官更不屈揖臨退仍進湯

皆于席南橫設百官之位升朝而坐京官以下皆立又  
曰唐制丞郎拜官即籠門謝今三司副使以上拜官則  
拜舞于階上百官拜于階下而不舞蹈此亦籠門故事  
也遇雨而旋亦籠門又曰三司開封府外州長官升廳  
事則有衙吏前導告喝今時之制在禁中惟三官得告  
宰相告于中書翰林學士告于本院御史告于朝堂皆  
用朱衣吏謂之三告官所經過處閤吏以槌扣地警衆  
謂打杖子

卷班班退也 起居畢宰執升殿尚書以次各隨其班次第相踵從上卷轉而出謂之卷班今門朝宰相升階百官歸班歸始立之班也大朝軍衛朝罷猶有卷班之儀左右各出皇極門之王門百官則散出

一墪一耜之墪也 周語虢文公曰土乃脈發先時九日太史告稷稷以告王曰史帥陽官王其祗祓監農不易王耕一墪班三之注一耜之墪也王無耦以一耜畊班三之下各三其上也

神倉籍田倉也 漢置籍田倉以給築盛置令丞古甸  
師也唐宋曰神倉縣邑常以乙未祀先農先農神農也  
晉志漢儀縣邑以乙日祀先農乃耕于乙地東京賦注  
帝籍田在國之辰地親耕乘芝車青衣幘按辰方即乙  
方今六壬家以寅納甲辰納乙而空子午卯酉是也  
宋賜福酒即勞酒之意也 月令勞酒自南齊行之江  
總有勞酒賦唐宋皆行勞酒禮明道元年耕十二畦賜  
百官福酒月令躬耕帝籍反執爵于大寢命曰勞酒

青箱隋也青綾緇宋也 隋書藉田令以青箱種稂之種跪呈司農詣耕所曬之唐不行此禮宋明道以製成御耒耜青箱等奏御青箱無蓋兩頭設襜飾以青中分九隔隔設一種覆以青帊求太宗所御耒耜而青綾緇依然如新于是即用舊緇

綴祭曰餽食 後漢張武傳祭餽廣韻餽祭也說文餽祭醑也醑綴祭也顏師古曰餽謂連續之祭也音綴武紀其下四方為餽食史封禪書為餽食羣臣從者一作

服郊祀志作服與餽醢綴並同後志中八陛陞五十八  
醢合四百六十四醢

畿釁也 說文畿以血有所涂祭也引周禮肆師掌祈  
珥者釁禮之事舊書祈為畿徐曰假借作祈本作畿字  
也禮記成廟則釁之雍人舉羊升屋自中屋剗羊血乃  
降門夾室皆用雞或作釁周禮小子珥于社稷祈于五  
祀鄭注珥當為珥祈或為釁士師凡釁珥釁禮之事用  
牲毛者曰釁羽者曰珥集韻亦作氛又作機肆師祈珥

鄭玄注祈當作進機之機按畿刳祈氣機相通畿刳氣  
是一字音畿

五射白矢參連剡注襄尺井儀也 白矢矢貫侯過見  
其鏃白也參連前放一矢後三矢連續而去也剡注羽  
頭高鏃低而去剡剡然也襄尺臣與君射不與君並立  
襄君一尺而退音讓井儀四矢貫侯如井之容儀也智  
謂白矢謂告矢即樂師之以行告也參連言耦立參連  
也襄不必讀讓正如兩服兩襄之義如歷家之襄亦謂

從旁記數也司射揚觸柶復揚觸謂矢揚而中侯也柶復謂不著而還復中也揚觸即剡注并儀謂四正具舉之儀也四正具舉見狸首詩周禮卿大夫退而以鄉射之禮五物詢衆庶曰和曰容曰主皮曰和容曰興舞亦五射也洪武三年詔行大射禮

僂衛試矢也周禮矢人夾而搖之注今人以指夾矢僂衛是也智按僂衛謂夾搖之聲也試矢者以手撚箭鏃去有聲以徵其直



參亭後為三停 詩行葦疏參亭謂三分矢一在前二在後輕重鈞亭也今畫龍畫人者皆分三停正謂三段均停因其停處有停筆體量之意

五御鳴和鸞逐水曲過君表舞交衢逐禽左也 鳴和鸞者和在式鸞在衡升車則馬動而鸞鳴和應也逐水曲者御車逐水勢屈曲而不墜水過君表者毛詩傳曰褐纏旃以為門君表即褐纏旃也舞交衢者謂御車在交道車旋應于舞節逐禽左者御驅逆之車逆驅禽獸

使左當人君以射之見保氏注按諸名皆漢儒所分賈公彥曰先鄭以意而言曾慥以五射五御謂天子諸侯卿大夫士其說亦順呂覽曰寒素作御列子曰造父之師曰泰豆氏

草止茷舍也 夏官教茷舍注草止之也軍有草止之法宋人劄子嘗言軍行草止

善為頌言能為頌貌威儀也故有容史 儒林傳徐生善為頌孝文時為禮官大夫傳子至孫襄亦以頌為大

夫言禮為頌由徐氏注蘇林曰漢舊儀有二郎為頌貌  
威儀事有徐氏張氏天下郡國有容史皆詣魯學之書  
式商容之間一曰商之禮官也故今禮部稱容臺按頌  
乃古容字从頁公平聲漢唐生褚生應博士弟子選摳  
衣登堂頌禮甚嚴又作額漢書容繫一作頌繫借為雅  
頌之頌借義奪正義故頌兒反借用容內之容一曰詩  
序云頌者美盛德之形容也正當作余封切讀詩紀載  
舟張辟廂之詩末引周官注所載曰敕爾瞽率爾衆工

奏爾悲誦肅肅雖無吉無凶誦音容是皆頌之轉聲  
則頌為容字益明矣

綿叢即綿葩 立竹及茅索營之也本音葩與叢同史

記注葩即纂徐廣曰叢子外反中原韻會對收入齊微

則叢正與今讀合耳九域志夔州八陣磧在魚腹平沙

上凡六十四葩

音撮

升菴引纂文曰葩今之纂字包愷作

既悅切賈逵曰束茅以表位也智按此則葩即綿葩之

葩考篆巴作𠂔𠂔作𠂔說文葩普巴切从艸白𠂔而不

从已其纂文所造邪抑聲通邪

鹵簿以大櫓為衛而紀之簿也 仗曰鹵簿鹵櫓也兵  
衛以甲楯居外為前導皆著之簿故曰鹵簿漢有甘泉  
鹵簿應劭有漢官鹵簿圖大駕備千乘萬騎屬車八十  
一乘五營填衛仲師注宮正曰若今時衛士填街蹕也  
祠宗廟用小駕減損副車後漢得公孫述瞽師樂器葆  
車諸物始備晉增流蘇馬跡禽盤盂斧之類唐宋相沿  
代有增飾侍中版奏中嚴外辦鼓三嚴其志乃詳可考

也元之輿服乃以漸改究亦虛文仍以笠騎為便耳升  
菴以鹵為鑪謂鑪香導引為鹵簿其說曲矣今時曰鸞  
駕有庫錦衣衛供掌紅盔大漢將軍一駙馬都尉一侯  
伯領之如誕馬扇箴附此餘俱附器用類

扇箴言以扇蓋為箴也 駕頭之後有繡扇緋羅繡曲

蓋俱內臣馬上執之謂之扇箴在細仗前一云在乘輿  
後嘉祐六年中丞韓絳請以閣門祇候內侍各二員挾  
駕頭左右次扇箴又以皇城親從其後駕頭乃初即位

之御坐也三朝志七寶牀一覆以緋羅繡帕內臣馬上捧之謂之駕頭孫愐云篋車籃也唐韻曰一名笑笑音替張瑤星曰今有卓影者每常朝在御座傍內藏三刃外以黃紗護之形如紈扇有機可施遇大風則徹之此前代所未有

但馬遂名誕馬 誕馬散馬也江夏王義恭傳平乘誕馬不過二唐有紫誕帶不知誕何義也今外官儀從皆有散馬前行名曰座馬亦曰引馬程氏演繁露曰王義

恭言誕馬猶言徒馬也酉陽雜俎齊迎南使傳詔二人騎馬荷信在前罩繖絳衫引從但馬在車後王瓊以誕馬并乘鞍與太保則知誕馬即但也淮南媒但即誕字王元美引大昌作袒馬謂其非是按大昌所載原不作袒遼史作韃馬注即誕馬

雙引者二朱衣人引馬也重金者金帶懸魚也東軒筆錄學士一人引馬帶用金而無魚至入兩府則雙引重金石林燕語學士止賜御仙花帶而不佩魚元豐制



行學士得佩魚故蘇軾謝學士表云玉堂賜篆寶帶重金

狔坐以金絲狔飾鞍坐也 石林燕語狔坐不知其始

太平興國中詔商庶許乘烏漆素鞍不得用狔毛煖坐天僖中定自中書舍人節度以上方許用老學菴筆記言墨敕盛行有視待制者晁叔用以視待制可對如夫人往往賜金帶然猶不敢坐狔故當時謂橫金無狔羈與閣門舍人等耳相如賦蛭蜎獠獠顏師古注曰今狔

皮為鞞褥者狨一名獠謂之金線狨則唐時已用此狨坐矣

今之貼黃乃古之引黃 唐制詔敕有更改以紙貼之曰貼黃葉石林曰今劄子皆白紙揭其要以黃紙別書謂之貼黃失之矣其表章略舉事目見于前封皮者謂之引黃今時即以引黃為貼黃而竝不用黃紙李肇曰帖黃或曰押黃龍川志曰富鄭公上章貼黃言臣與韓琦言不當起復是以引黃為貼黃也江隣幾雜誌曰貼

黃上更加撮白

引唶即騶唱也 梁制令僕中丞各給威儀十人武冠

絳繡皆呼入殿引唶至階一人執儀囊不唶唶音橫類

篇曰喧也以七人同聲唱導也程泰之言令僕中丞騶

唱得入宮門朱仲遠諸準朝式在軍鳴騶宋謂之喝又

曰腰喝

唯酒一作雕酒即催酒也元有喝蓋之儀 李涪刊誤

言雕酒三十拍促曲名三臺雕合作碎蓋送酒也資暇

錄言與浩同程大昌言內燕抗聲索樂但云牀

音

酒字

書牀屈破也當是啐酒之轉名賢詩話王仁裕詩芳尊  
每命管絃唯又趙鰲交趾事跡言唯酒逐歌可知唯酒  
乃唐人熟語宋相沿不改也義當用催而別作牀唯何  
必強引啐字三臺者作樂時部首拍版三聲然後管色  
振作李濟翁以為鄴中三臺劉公嘉話言高洋築三臺  
愚謂乃曲名耳陶九成曰宴饗一人執拍版贊曰幹脫  
執觴者和之曰打弼則節一版而衆樂皆作謂之喝盞

別奏曲則曰謁盞

鞞鞋白事中書此學士躡履禮也 夢溪曰學士舍人

躡履見丞相用平狀扣階乘馬近歲多用靴簡東軒筆

錄曰故事學士白事于中書皆公服鞞鞋章惇直院人

皆躡足束笏而惇散手繫鞋忽行此禮中丞鄧綰怒之

壓角隅坐也 裴廷裕東觀奏記曰令狐綯舉裴坦知

制誥故事謁謝丞相畢便于本院上事四輔送之施一

榻壓角而坐程泰之曰此即壓角故事以今按之是名

僉坐猶今之都察院之僉都坐法也宋次道云舍人工事紫褥面北拜廳角閣老立褥之東北隅曰壓角五代會要言所存壓角之禮則是次道所言也

懷宴物歸起于唐 子淵曰廷宴餘物懷歸起于唐宣宗時宴百官罷拜舞遺下果物怪問咸曰歸獻父母及遺小兒上敕大官今後大宴給食兩分與父母別給果子與男女所食餘者聽以帕子懷歸洪武賜宴謹身殿東西廡有大宴中宴常宴小宴嘉靖有宮殿落成書成


之宴大宴御午門百官席列棧棚前墀中宴畢頂門行禮長班各持其牲脯經筵賜宴內廊日講不設召對先賜茶食猶唐宋廊餐也若宴宰執于御苑大誥言君臣用遊發為咏歌後有召宰輔乘馬入并具金爵賜之此倣祖宗朝之曠典也

納幣笄實有膠漆九子之稱今猶古也 遯園曰金陵人家行聘禮行納幣禮其笄盒中用柏枝及絲線絡篋作長串或翦綵作鴛鴦又或以糖澆成之又用膠漆丁

香粘合綵絨結束或用萬年青草吉祥草相調為吉慶之兆考通志婚禮後漢之俗聘禮三十物以玄纁羊鴈清酒白酒粳米稷米蒲葦卷柏嘉禾長命縷膠漆五色絲合驩鈴九子墨金錢祿得香草鳳皇含利獸鴛鴦受福獸魚鹿烏九子婦陽燧鑽凡二十八物又有丹為五色之榮青為東方之始共三十物皆有俗儀不足書按此則今俗相沿之儀物固有所自來矣酉陽雜俎言納采九事曰合驩曰嘉禾曰阿膠曰九子蒲曰朱葦曰雙



石曰綿絮曰長命縷曰乾漆九事皆有詞各有取義智  
又按器之追乳者皆言百子至今尚百子杯楓窻小牖  
言百子帳捲柳為圈相連瑣百張百闔演繁露言唐大  
婚有百子帳今其制如穹廬



通雅卷二十八